

OFFERYNNAU STATUDOL CYMRU

2000 Rhif 1866 (Cy.125)

BWYD, CYMRU

Rheoliadau Bwyd Meddygol (Cymru) 2000

Wedi'u gwneud - - 14 Gorffennaf 2000

Yn dod i rym - - 1 Tachwedd 2001

Drwy arfer y pwerau a roddwyd i Weinidogion y Goron gan adrannau 6(4), 17(1), 26(1)(a) a (3) a 48(1) o Ddeddf Diogelwch Bwyd 1990(1) ac a freiniwyd bellach yng Nghynulliad Cenedlaethol Cymru(2), mae Cynulliad Cenedlaethol Cymru, ar ôl rhoi sylw yn unol ag adran 48(4A) o'r Ddeddf honno i gyngor perthnasol a roddwyd gan yr Asiantaeth Safonau Bwyd, ar ôl ymgynghori yn unol ag adran 48(4) o'r Ddeddf honno â'r sefydliadau hynny sy'n ymddangos iddo eu bod yn cynrychioli buddiannau y mae'n debygol y bydd y Rheoliadau yn effeithio arnynt yn sylweddol, yn gwneud y Rheoliadau canlynol:

Enwi, ychwyn a chymhwyso

1. Enw'r Rheoliadau hyn yw Rheoliadau Bwyd Meddygol (Cymru) 2000, a deuant i rym ar 1 Tachwedd 2001 a byddant yn gymwys i Gymru.

Dehongli

2. Yn y Rheoliadau hyn —

ystyr “bwyd meddygol” (“*medical food*”) yw bwyd sy'n dod o fewn dosbarth bwydydd deietegol at ddibenion meddygol arbennig y gosodir gofynion cyfansoddi a labelu ar eu cyfer yn y Gyfarwyddeb; ystyr “y Ddeddf” (“*the Act*”) yw Deddf Diogelwch Bwyd 1990;

ystyr “y Gyfarwyddeb” (“*the Directive*”) yw Cyfarwyddeb y Comisiwn 1999/21/EC ar fwydydd deietegol at ddibenion meddygol arbennig(3); a

mae “gwerthu” (“*sell*”) yn cynnwys meddu ar gyfer gwerthu a chynnig, rhoi ar werth neu hysbysebu (ac eithrio drwy gyfrwng label neu bapur lapio).

(1) 1990 p.16; Diwygiwyd adran 6(4) o'r Ddeddf gan baragraff 6 o Atodlen 9 i Ddeddf Dadreoli a Chontractio Allan 1994 (p.40) a chan baragraff 10(3) o Atodlen 5 i Ddeddf Safonau Bwyd 1999 (p.28). Diwygiwyd adran 48 gan baragraff 21 o Atodlen 5 i Ddeddf Safonau Bwyd 1999. Trosglwyddwyd swyddogaethau a freiniwyd yng Ngweinidogion y Goron, mewn perthynas â Chymru, i Gynulliad Cenedlaethol Cymru gan O.S. 1999/672 .

(2) Gweler Gorchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672).

(3) OJ Rhif L91, 7.4.1999, t.29.

Cyfyngiadau ar werthu

3.—(1) Ni chaiff neb werthu bwyd meddygol oni bai —

- (a) fod ei fformiwleiddiad a'i gyfansoddiad, a'r cyfarwyddiadau defnyddio cyfryw ag y byddant yn sicrhau eu bod yn cydymffurfio ag Erthygl 3 o'r Gyfarwyddeb fel y'i darllennir ynghyd â'r Atodlen iddi;
- (b) fod yr enw y mae'n cael ei werthu o dano yn cydymffurfio ag Erthygl 4(1) o'r Gyfarwyddeb; ac
- (c) fod ei labelu yn unol ag Erthygl 4(2) i (5) o'r Gyfarwyddeb.

(2) Nid yw person sydd, mewn perthynas â bwyd meddygol o fath arbennig —

- (a) yn hysbysydd dynodedig, sef gwneuthurwr neu fewnforiwr o dan Erthygl 5 o'r Gyfarwyddeb, ond
- (b) sydd wedi methu cydymffurfio â'r rheidrwydd i hysbysu'r awdurdod cymwys y cyfeirir ato yn yr Erthygl honno,

yn cael gwerthu bwyd meddygol o'r math hwnnw.

(3) At ddibenion paragraff (2) uchod yr awdurdod cymwys yw —

- (a) mewn perthynas â bwyd meddygol a wneir yng Nghymru, neu a fewnforir i Gymru o'r tu allan i'r Deyrnas Unedig, yr Asiantaeth Safonau Bwyd;
- (b) mewn perthynas â bwyd meddygol a wneir mewn tiriogaeth arall o fewn y Deyrnas Unedig (neu a fewnforir o'r tu allan i'r Deyrnas Unedig i diriogaeth arall o fewn y Deyrnas Unedig), yr awdurdod a ddynodir i'r pwrpas hwnnw yn y diriogaeth honno fel yr awdurdod cymwys at ddibenion Erthygl 5 o'r Gyfarwyddeb mewn perthynas â'r bwyd.

Gorfodi

4. Rhaid i bob awdurdod bwyd orfodi a gweithredu'r Rheoliadau hyn yn ei ardal.

Troseddau a chosbau

5. Os bydd i unrhyw berson —

- (a) dorri rheoliad 3(1) uchod, neu
- (b) heb esgus rhesymol dorri rheoliad 3(2) uchod,

bydd ef neu hi yn euog o drosedd ac ar gollfarn ynadol yn agored i gosb nad yw'n fwy na lefel 5 ar y raddfa safonol.

Amddiffyniad mewn perthynas ag allforion

6. — Mewn unrhyw achos sy'n ymwneud â throedd o dan reoliad 3(1) uchod bydd yn amddiffyniad i'r person a gyhuddir brofi bod y bwyd yr honnir i'r drosedd gael ei chyflawni mewn perthynas ag ef wedi'i fwriadu i'w allforio i wlad (nad yw'n aelod-Wladwriaeth) ac iddi ddeddfwriaeth gyfweidd â'r Rheoliadau hyn a bod y bwyd yn cydymffurfio â'r ddeddfwriaeth honno.

Cymhwyso amrywiol ddarpariaethau Deddf Diogelwch Bwyd 1990

7. Bydd darpariaethau canlynol y Ddeddf yn gymwys at ddibenion y Rheoliadau hyn ac, oni bai fod y cyd-destun yn mynnu fel arall, dehonglir unrhyw gyfeiriad yn y darpariaethau hynny at y Ddeddf neu at Ran ohoni at ddibenion y Rheoliadau hyn fel cyfeiriad at y Rheoliadau hyn:

- (a) adran 2 (ystyr estynedig “gwerthu” etc.);
- (b) adran 3 (rhagdybiau bod bwyd wedi'i fwriadu ar gyfer ei fwyta gan bobl);

- (c) adran 20 (Troseddau sy'n deillio o fai person arall);
- (ch) adran 21 (amddiffyniad ar sail diwydrwydd dyladwy) fel y mae'n gymwys at ddibenion adran 8, 14 neu 15 o'r Ddeddf;
- (d) adran 22 (amddiffyniad ar sail cyhoeddi yng nghwrs busnes);
- (dd) adran 30(8) (sy'n ymwneud â thystiolaeth ddogfennol);
- (e) adran 33 (rhwystro etc. swyddogion);
- (f) adran 35(1) i (3) (cosbi troseddau) i'r graddau ei fod yn ymwneud â throseddau o dan adran 33(1) a (2) fel y cymhwysir hwy gan baragraff (e) uchod;
- (ff) adran 36 (troseddau gan gyrff corfforaethol); a
- (g) adran 44 (amddiffyn swyddogion sy'n gweithredu'n ddidwyll).

Llofnodwyd ar ran Cynulliad Cenedlaethol Cymru o dan adran 66(1) o Ddeddf Llywodraeth Cymru 1998(4)

14 Gorffennaf 2000

Jane Davidson
Y Dirprwy Lywydd Cynulliad, Cenedlaethol
Cymru

(4) 1998 c. 38.

EXPLANATORY NOTE

(Nid yw'r Nodyn hwn yn rhan o'r Rheoliadau)

Mae'r Rheoliadau hyn, sy'n dod i rym ar 1 Tachwedd 2001, yn gweithredu yng Nghymru Gyfarwyddeb y Comisiwn 1999/21/EC ar fwydydd deietegol at ddibenion meddygol arbennig.

Mae Erthygl 1(2) o'r Gyfarwyddeb yn rhoi dosbarth i'r bwydydd hynny fel bwydydd a brosesir yn arbennig neu a fformwleiddir yn arbennig ar gyfer rheoli o dan oruchwyliaeth feddygol ddeiet y cleifion hynny sydd angen deiet arbennig, ac mae rheoliad 2 o'r Rheoliadau hyn yn diffinio bwyd meddygol fel bwyd o fewn y dosbarth hwnnw.

Mae Erthygl 2 o'r Gyfarwyddeb yn galw ar Aelod-wladwriaethau i sicrhau y gellir marchnata bwyd o'r fath dim ond os yw'n cydymffurfio â'r Gyfarwyddeb. Mae Erthyglau 3 a 4 o'r Gyfarwyddeb yn gosod gofynion ar gyfer fformwleiddio, cyfansoddi a chyfarwyddiadau ar ddefnyddio bwyd o'r fath, ac ar gyfer ei enwi a'i labelu. Mae rheoliad 3(1) o'r Rheoliadau hyn yn gwahardd gwerthu bwyd meddygol oni bai fod y gofynion hynny'n cael eu bodloni.

Mae Erthygl 5 o'r Gyfarwyddeb yn ei gwneud yn ofynnol hysbysu'r awdurdodau cymwys fod cynhyrchion sy'n dod o dan y Gyfarwyddeb yn cael eu rhoi ar y farchnad p'un a ydynt yn cael eu gwneud o fewn y Gymuned Ewropeaidd, neu'n cael eu mewnforio o'r tu allan iddi. Mae rheoliad 3(2) a (3) yn gwahardd gwneuthurwyr a mewnforyr rhag gwerthu bwydydd meddygol y mae'n ofynnol eu hysbysu oni bai eu bod wedi cydymffurfio â'r gofynion i hysbysu. Yn achos bwydydd meddygol a wneir yng Nghymru, neu a fewnforir i Gymru o'r tu allan i'r Deyrnas Unedig, yr awdurdod perthnasol yw'r Asiantaeth Safonau Bwyd.

Mae rheoliadau 4, 5 a 7 yn nodi cyfrifoldebau gorfodi, troseddau a chosbau, a chymhwysiad darpariaethau Deddf Diogelwch Bwyd 1990.

Mae'r Rheoliadau yn darparu amddiffyniad hefyd mewn perthynas ag allforion, yn unol ag Erthyglau 2 a 3 o Gyfarwyddeb y Cyngor 89/397/EC (OJ Rhif L186, 30.6.89, t.23) ar reolaeth swyddogol ar fwydydd (rheoliad 6).